



SEAD DURAKOVIĆ I SEAD FAZLIĆ PRIMALI MITO

Brigadir OSBiH na optuženičkoj klupi

Tužilac Odjela III Tužilaštva BiH podigao je optužnicu protiv Seada Durakovića (1967) iz Bihaća, ranije osuđivanog državljanina BiH, koji je zaposlen kao profesionalno vojno lice, po činu brigadir u Oružanim snagama BiH sa sjedištem u Banjoj Luci, i Seada Fazlića (1961) iz Bihaća, koji je također ranije osuđivan.

Optuženi Duraković, kao visokopozicionirani oficir u Oružanim snagama BiH, tereti se da je u periodu od jula 2011. do kraja septembra 2014. u kontinuitetu obećavao osobama da će, s ciljem pribavljanja protivpravne imovinske koristi, koristeći službeni položaj i status, te u zamjenu za odgovarajuću novčanu naknadu u različitim iznosima, uglavnom od više hiljada KM, vršiti protivzakonito posredovanje i omogućiti im da se zaposle u Oružanim snagama BiH, na način što će uticati na tok konkursnih procedura unutar ove institucije.

Prema navodima optužnice, Duraković je primao nagradu da izvrši dato "obećanje" prethodno opisane radnje, a optuženi Sead Fazlić tereti se da je sa umiš-



ljajem pomogao da prvooptuženi primi nagradu, kako bi koristeći službeni i uticajni položaj u institucijama BiH posredovao da se izvrši službena radnja koja se ne bi smjela izvršiti. Optužnica je prosljeđena Sudu BiH na potvrđivanje, saopćeno je iz Tužilaštva.

Podsjetimo, Sead Duraković je 2013. suspendovan odlukom tadašnjeg ministra odbrane Zekerijaha Osmića zbog sumnje da je uzimao mito u procesu zapošljavanja podoficira. Odluka o suspenziji važila je do okončanja disciplinskog postupka, a mediji su u to vrijeme pisali da je Duraković za "štimanje" čitavo vrijeme uzimao i do 15.000 KM. Ministar Osmić je te godine podnio i krivičnu prijavu protiv Seada Durakovića, a u istragu se uključila i SIPA.